



DCS-Chlais

2025

Intro I

Das Johr isch es emal ganz neu:
Statt usem Norde chum ich usem Süde zu Eu.
Ich cha's empfäle, s'isch wärmer als da –
und das emol nid wägem Wandel vom Klima.
Lueged de Schmutzli aa doch emol ganz gschwind:
Er het en total en verbrännte Grind!
Wo mer über'd Gränze sind cho
händ'sen als Migrant nid welle ineloh.
Aber er hed denn eifach mal ganz luut g'chnurret
und so - wie de Trump - die Memme überschnorret.

Doch bevor ich Euch denn d'Zündig ischtelle
wämmer lose was mir Euchi Welpen verzelle.

Intro II

Dä Chlais dä findets wunderbar
wenn er zurugglueget is Cross-Country-Jahr.
Öb Schar oder Flex, das isch einerlei:
Ihr sind suber glandet uf Platz drei.
Aaber... jetzt isch fertig mit em fründliche Gschpass.
Jetzt werded denn d'Auge vor Angscht grad nass!
Denn Grössewahn dä hed Euch würklech packt -
Dezue bruch'ts die ganzi Mitgliederschaft:
Euche Name wänd Ihr renommeiere
und tüend es Flugfäschts organisiere.
Schliesslich zelled Ihr 50 Jahr,
das bruch't Euchi Lüt mit Huut und Haar.
Und um z'schtrapaziere Euchi ganzi Chraft
gits au no e Schwiizer Meischterschaft!
Ich bi würklech baff und mache hüt jedi Wett
das dä Locher Euch dezue überschnorret hett.



**Seppi Häcki, Werni Vogel, Märk Strebel, Kurt Weber, Paul Mathis,
Ruedi Bircher, Kasi Steiger, Walti Flüeler, Urs Bättig**

Tuesch mol am Haldi d'Nordrampe abeschliche
pass uf, dass es Di am Gägehang nid tuet verschtriche!
Doch Ihr händ Euch darüber kümmeret gar fein:
Sind d'Bauchnuschti vo dem mängisch e chli träge Verein.
Ihr händ bohret und grabet – s'het nur so gschtobe -
händ die Rampe verbreiteret und ufe g'hobe.
S'Problem isch tiptop g'löst, ich chönnti luut johle,
sogar dä Chlais mit Esel chönnt jetzt det abetrohle.

Ruedi-The-Eagle und Fränzi Bircher

Wenn er abgsoffe isch, dä Pilotehuufe
chaner bi Euch grad go wiitersuufe!
Ich lobe Euch jedes Johr und g'höre keis g'Jammer:
S'Bircher's Gaschtfründschaft isch eifach de Hammer!
Und mit em guete Bischpil gaht au no vorah
als gmäldete Hälfer für d'SM d'Franziska!
Ihr sind – und das scho sit mängem Jahr –
für de Deltaclub Stans es gar wärtvolls Paar!
Schmutzli, lueg mol da uf'd Franziska:
Ich find, au sie soll es Seckli haa.

Werni Vogel

Wenn ich an en Felse in ere Brandig dank
g'nehm ich immer Dis Bild – und das isch es Gschänk!
Ohni Dich wär dä Club – ich gseh das mit Gruuse –
scho lang und jämmerlich am schtill ipfuuse.
Jedes Jahr uf's Neue dörf mis Lob da rumore.
Jedes Jahr uf's Neue –s'isch scho bald Folklore!
Euche Präsi – leider gseh en hüt nid da –
isch dank Dir en wahrhaftig glückliche Maa.
Drum bedankt sich dä Chlais a sinere Schtell
bi Dir jetzt. Du bisch en ganz en tolle Gsell!
Dä Chlais het Dir do hüt au no en wärtvolle Tip:
Nimm uf'd Chlinge doch amigs en Sack Ersatzbölzli mit!



Fredy Bircher

Ich ghöre Dich uf em Berg ja gar luut flueche,
wenn dis verschöggelete Gurtzüg muesch sueche.
Du bisch uf em Stanserhorn vom Morge bis z'Abe
schtolperisch mit Tourischte det de Hang obenabe.
Sogar en berüemte Schwiizer findet das glatt:
Er nännt sich schlicht Marco Odermatt.
Es git aber eis wo Du bitte nid muesch:
Dass jetzt uf Schilehrer umsattle tuesch!

Sigi Ullrich

Du bisch en gar schtolze Wohnmobil-Maa.
Am Chaare het's es choge geils Logo draa!
Im Juli bisch demit uf Griifeburg g'schtoche
um Dini Kollege gar fein z'bechoche.
Chochkunscht bi Sunne und bi Räge -
Gault Millau isch en Dräck degäge.
Dä Chlais dankt Dir herzlich - er wär au gern mit derbi -
und hofft inschtändig, Du bisch dört nid s'letscht Mol gsi!

Ruedi Imholz

D'Finanze im Griff hesch Du unerhört
und mängisch isch es au umgekehrt.
Bi süümige Zahler wirsch denn au mol barsch
und gisch ne en schriftliche Gingg in Arsch.
Din grosse Arbetsufwand dä laht sich gseh –
für'd SM gits ja denn no einige meh!
Vile Dank Dir, Ruedi – das säg i hüt z'obe –
ich schüttle Dir d'Hand und tue Di gärn lobe!

Märk Limacher

Mängisch chunnt de Chlais nümme so ganz druus:
Denn öppedie gsehsch Du rächt ramponiert uus!
Derbi bisch Du nur no en Musikus:
Für d'Flügerei schint bi Dir d'Luft duss!
Dä Chlais weiss de Grund – und dä isch heiss:
Du lidisch under Materialverschleiss!
Aber als Organisator bisch Du ganz klar Eis-A:
Suscht würded mir hüt und jetzt nid da unde schtah.



Dani Oberhänsli

Du bisch s'Gedächtnis vom Verein – und das isch wahr:
Denn im Mänätschment bisch en tüchtige Aktuar!
Aber nid nur im Vorstand – da gits bigoscht no meh:
Du erfüllsch dä Job au im SM-Organisationskomitee!
Glichzeitig – und das cha wüerklich niemer aaschtrebe –
muesch als Sockehalter vom Locher no anehebe!
Dini Arbet blibt im Chlais nid verborge.
Nur dini Frise – isch noni besser worde!

Seppi Häcki

Wenn mer Behörde muess verschtah
chamer sich voll uf Dich verlah.
Au Schstrukture für en SM mit allne Verträg
bringsch Du locker mit Liechtigkeit zwäg.
Im OK bisch super-professionel Oh Sepp.
Es sell nie öpper säge Du sigisch en Depp!

Guido Mathys

Wenn mir's hüt warm händ ame ne Fүүr -
bsunders wenn's e so chalt isch wie hüür -
will de Chlaus sini Dankbarkeit pfläge
und Dir transchpirierend danke säge!
Viele Dank Dir Guido - ich säg's nid zum Spass:
Als Clubheizer bisch Du einsami Klass!
En warme Typ bisch Du aber nid, oh nei!
Aber vom Deltaclub Stans de heissischi Guy!

Jan Spycher

Ich gseh'nen da - und schtuune fascht -
Ihr händ ja hüt en Ehregascht!
Uf em Flugplatz Buochs isch er am büggle
und lehrt Euch am Funk no änglisch schtigle!
De Schwiizer Luftruum kännt er vo A bis Z -
er weiss vo was er am Refresher-Kurs redt.
Und wenn't am Flugplatz bisch ganz dehydriert
er Dir sogar es chüels Bierli schpändiert.
Für Euchi SM sitzt er beratend bii -
ich glaub dä Maa mues sehr wichtig sii!



Urs Niederberger

Vili Clubmitglieder sind für Dich nüd Neus:
Vo früener kännsch no die meischte alte Chläus.
Jetzt schpilsch Du – und das isch kein Hohn -
bim Deltaclub Stans de verlornigi Sohn.
Obwohl Du no kein Club-Biitrag hesch müesse entrichte
muesch au Du nid uf es paar Nüssli verzichte!

Thesi Peduzzi

Als Firscht Lady bisch wenigstens Du hüt do
wenn Din Alte scho nid hät chönne cho.
Mit Grossmuet ertreisch Du ohni Chummer
wenn dä z'Griiffenburg hocket de halbi Summer.
I sim Name säg ich Dir tusig Dank:
Er isch en Chlaus – das isch kein Schwank!

Extro

Das wär's wider gsi für es Flügerjohr.
Ich dank Euch für Euches offnige Ohr.
Pfläged d'Fründschaft au mit Euchene Jungpilote
dänn git Euch de Chlais no e besseri Note!
Vergässed au nid Euch Gedanke z'mache
über Geburtstag, Flügerfäscht und senigi Sache!
Bached viel Chüeche für de Jubiläumsobe –
dänn chan Euch dä Chlais ime Johr wieder lobe!
50gi wird mer nur einisch im Läbe –
da dörf mer nach öppis Grösserem schtrebe!
Ich hoff dä 50igscht Geburri wärded Ihr fröhlich fire
und nid wehmüetig um's „Frühner“ ume lire!
Händ e churzwiligi Zit bi Chälti und Schnee -
händ Sorg, das ich Euch all ime Johr wieder g'seh!
Mir mached Eus vom Acher – müend de witeri Wäg ufsueche –
und hoffed, mer findet unterwähs nochli Kafi und Chueche.
Ich wünsch Euch für's nächscht Johr vo de Thermik gar viel,
und immer meh als nume gnueg Luft underem Kiel!